

AKTE VAN OPSKORTING VAN DIE KERKVERBAND met die RING VAN SOMERSET-WES

en die SINODE VAN WES- EN SUID-KAAPLAND en die ALGEMENE SINODE VAN DIE NEDERDUITSE GEREFORMEERDE KERK

Aangesien die Nederduitse Gereformeerde Gemeente Die Strand onwrikbaar staan by die Bybel as die heilige en onfeilbare Woord van God, en

Aangesien die Nederduitse Gereformeerde Gemeente Die Strand glo dat die leer soos vervat in die drie algemene geloofsbelydenisse en die drie Formuliere van Eenheid, naamlik die Nederlandse Geloofsbelydenis (Confessio Belgica), die Heidelbergse Kategismus en die Dordtse Leerreëls, ooreenkom met die Woord van God, en

Aangesien sommige gemeentes, ampsdraers en lidmate van die Ring van Somerset-Wes, die Sinode van Wes- en Suid-Kaapland en dosente by die teologiese opleiding aan die Universiteit van Stellenbosch, Vrystaat en Pretoria, nie meer hierdie leer getrou verkondig en uitleef nie, en nie dwalinge wat met hierdie leer in stryd is, weerlê en uit die kerk weer nie, en

Aangesien daar by sommige meerdere vergaderinge van die kerkverband nie aan die kerklike orde gehou word nie, en

Aangesien die kerkverband nie met aandag en ywer besig is om die Koninkryk van God in ons geknelde land uit te brei deur die bevordering van die kennis van, vertrouwe in en gehoorsaamheid aan die Drie-enige God nie, en

Aangesien sommige predikante met hulle gemeentes en dosente met hulle studente onnadenkende, onkritiese en selfs roekelose en onverskrokke napraters en navolgers van die tydsgees geword het, op relatiewe en subjektiewe wyse met die Bybel omgaan, eie inhoud aan Bybelse waarhede oor die Skepping en sondeval, die huwelik en seksualiteit, saamwoon van ongetroudes, die persoonlike bestaan van die Bese en ander teologies-dogmatiese en teologies-etiese sake gee, en as bondgenote optree van ideologies gedrewe groepe wat die kerk en kerklike vergaderinge binnedring en die kerk en kerkvergaderinge vir hulle eie agenda geëe het, en

Aangesien ampsdraers en lidmate van die kerk, wat met die Woord van God, die Gereformeerde Belydenis en die Kerkorde as maatstaf die werk van vergaderings en leidende persone beoordeel, se gegronde besware geïgnoreer, geminag, verdraaid voorgestel, liefdeloos geag, valslik weerlê en selfs uitgedaag word, en

Aangesien die Nederduitse Gereformeerde Gemeente Die Strand aan die kerkverband bekend gemaak het en vir twee en 'n half jaar daarvoor gedoleer (getreur) het, het die kerkverband desondanks weinig, indien enigsins, daarna geluister, alhoewel daar een besoek deur die Ringkommissie en een deur 'n Sinodale afvaardiging was, daar niks gesê of gedoen is om die gemeente tot ander insigte te kon bring nie en geen aanduiding dat daar ware berou vir die rigting wat die genoemde vergaderings ingeslaan het. Ons oproep tot bekering en terugdraai na God en Sy Woord het op dowe ore geval.

Daarom besluit die Kerkraad die volgende:

1. Die Nederduitse Gereformeerde Gemeente Die Strand, handelend as Die Strand Gemeente, betree nou die volgende stap van dolering, nadat die doel van ons aanvanklike dolering, naamlik om die kerkverband op te roep om terug te keer na die Woord van God alleen (sola scriptura), na twee en 'n half hartseer jare nie op bekering en berou uitgeloop het nie, maar steeds deur die kerkverband in kerkvergaderinge en by die teologiese opleiding teengestaan is.
2. Die Nederduitse Gereformeerde Gemeente Die Strand, synde 'n regspersoon in eie reg en volledig kerk, skort met behoud van alle regte, voorregte, besittings, naam, seggenskap oor eiendom, finansies, werksaamhede, diensverhoudinge, ampsbevoegdheid en lidmaatskap van enige fonds en organisasie, die verband met die Ring van Somerset-Wes, die Sinode van Wes- en Suid-Kaapland en die Algemene Sinode van die Nederduitse Gereformeerde Kerk op insluitend eweredige bydraes, omdat so 'n stap voor God in die lig van sy Woord regverdig kan word. Die gemeente sal wel direkte bydraes maak tot Barmhartigheid en Evangelisasie.
3. Die Nederduitse Gereformeerde Gemeente Die Strand behou haar identiteit as Nederduitse Gereformeerde Kerk soos uitgedruk in die Bybel en die Belydenis.(vergelyk Kerkorde, Artikel 1)
4. Die Nederduitse Gereformeerde Gemeente Die Strand is nie van voorneme om ná opskorting van die kerkverband as 'n onafhanklike gemeente te bly voortbestaan nie en sal, soos dit 'n gereformeerde kerk betaam, bly soek na NG gemeentes, ringe en sinodes met wie daar op dieselfde grondslag, wat leer en lewe betref, saamgewerk kan word ten opsigte van onderlinge opsig, tug en ondersteuning, in verband getree kan word.
5. Die Nederduitse Gereformeerde Gemeente Die Strand behou die dienste van die leraar en ander besoldigde amptenare. Die Kerkraad of sy gevolmagtigde sal vanaf die datum van die opskorting van die kerkverband uitsluitlik die diensverhoudinge in die gemeente bestuur. Opsig en tug sal slegs hanteer sal word deur meerdere vergadering wat ook in leer en lewe bly by Kerkorde, Artikel 1.
6. Die Nederduitse Gereformeerde Gemeente Die Strand se opskorting van die kerkverband verander nie aan die lidmaatskap van die gemeente en die uitoefening van enige lidmaatskapregte nie. Dit sal egter enige lidmaat vrystaan om van gemeente te verander, indien so 'n lidmaat aan 'n gemeente wil behoort wat steeds in verband met die Ring van Somerset -Wes, die Sinode van Wes- en Suid-Kaapland en die Algemene Sinode van die Nederduitse Gereformeerde Kerk staan. Insgelyks verander die ampsposisie, ampsverpligtinge en ampsvoorregte in die Gemeente op geen wyse nie.
7. Die Nederduitse Gereformeerde Gemeente Die Strand se besluit tot opskorting van die kerkverband is onmiddellik van krag, maar word op twee agtereenvolgende Sondae aan die Gemeente gekommunikeer met die oog op enige konstruktiewe inset vanuit die Gemeente wat betref die verdere pad vorentoe vir aanvullende goedkeuring deur die Kerkraad. Die enigste voorwaarde vir die bekragtiging van die besluit is dat die meerderheid van die Kerkraad met die besluite saamstem. Sou daar enige versoek tot revisie van die besluite van 'n ingeskrewe lidmaat ontvang word, sal die Kerkraad dit oorweeg en daaroor beslis.
8. Die Nederduitse Gereformeerde Gemeente Die Strand neem hierdie besluite in biddende afhanklikheid van en in onvoorwaardelike gehoorsaamheid teenoor die Here van die kerk.

Besluite geneem by die Spesiale Kerkraadsvergadering gehou op 18 Januarie 2024


Geteken:




Voorsitter: Ds. FWC van Niekerk




Datum



Ondervoorsitter: Cas Fourie



Datum



Skriba: Sunet Pentz



Datum